



partii naleraq

UKA 2015/135
25-11-2015

Suliffissaaleqineq akimorniarlugu aammalu aalisarneq patajaallisarniarlugu umiarsuarnik tunitsivinnik tunisassiorsinnaasunik ("umiarsuit tunisassiortut") atuinerup qanoq siuarsarneqarsinnaaneranut tunngatillugu oqallinnissamut siunnersuut
(Inatsisartunut ilaasortaq, Jens Immanuelson, Siumut)

Inatsisartunut ilaasortaq Jens Immanuelson Siumut oqallinnissamik siunnersuuteqarpoq tassalu umiarsuarnik tunitsivinnik tunisassiorsinnaasunik tamannalu soqutigalugu Partii Naleqqamiit oqaaseqarfigissavarput.

Nunatsinni aalisarnikkut tunisassiornikkullu ineriartortitsiveqassaagut aporfilersuingitsumik, naliginnaavallaqaaq ilaatigut tunitsivinnik piorsaaniartunut aporfissalersuinerup annertuallaarujussuarnera, Aalisarnikkut pisortaqqarfeqassaagut ineriartormik siuarsaasumik, imaangitsoq aporfissalersuisumik, tamannalu allangorluinnartariaqarpoq nunatsinnimmi aalisarneq piniarnerlu inuussutissarsiutaapput pingaarnarpaat taamaattumik ingerlalluartariaqarput aningaasammi amigaatigaagut ineriartortitserusuttunullu aporfiutinneqartartut peerluinnartariaqarput

Nunatsinni aalisarnikkut periarfissat aalisartukkunnut pitsaasuunissaat aammalu ataavartumik ukioq naallugu ingerlasut tunitsiviit pigineqarnissaat inuiaqatigiinnii aningaasarsiornikkut pingaartilluinnassagipput oqaatigerusupparput, tassami naliginnaavallaalerpoq aalisartut aningaasarsiornikkut periarfissaasa killeqartitaanerujussuat tunitsiviit pisinnaasaasa killeqarnerujussuat pissutigalugu.

Tunisassiorfiit qiviaraanni soorunami tamanna aalisartunut tunitsivissaqartitsiniarlutik naammassiniarlugu ilungersortut tusartarpagut, kisianni taanna kisiat tuppallersaatigissallugu naammangilaq. Tassami tunitsiviit ammagaluartut aalisartukkut killilersuiffigineqarnerujussuat takornartaangitsoq ilisimavarput, tamannalu ilungersunartorujussummat allangortitariaqarpoq.

Pingaartumik aasaanerani aalisakkat maneruttoorfiini tunitsiviit annertuumik killilersuileraangata aalisartukkormiunut ilungersunartorujussuusoq takusinnaavarput, sunniutaami imaaginnangilaq aalisartut kisimik eqqorneqartartut, nunattali aningaasarsiornikkut ingerlanera tamavimmi sunnerneqartarmat.

Taamaattumik aqqissuussinerput imatut ilusilersortariaqalerparput, tunisassiat tamavimmik naammassineqarlutik tunisassiarineqartassapput imaangitsoq sulisussaarusneq pissutigalugu aalisakkanik nalilissuarnik eqqaassasugut. Tunisassiornikkut sukkanerpaamik aammalu

iluanarfiunerpaamik ingerlasoqartariaqarpoq tassami pissutsit aasaanerani akuerinnarsinnaajunnaarpagut sulissussaqaqnginneq pissutigalugu aningaasanik inuiaqatigiit isertitassaannik annaasaqartuarneq allanngortariaqalerporlu tamanna.

Aalisarneq ullumikkornit annerusumik ingerlalluarnerusinnaagaluartoq tamatta nalunngilarput ingerlatsineq naleqqussarneqartuuppat, sumiiffikkaanni aalisakkat takkusimaarfiini pinngitsoorneqarsinnaanngilaq immikkut aaqqissuussisarnissaq aammalu umiarsualiinerit ilaatigut annertusarneqarsinnaapput aalisartunut iluanaarfiunerusumik aaqqissuussiniartariaqaratta.

Naalackersuisut akissutaanni uggonarluinnartumik qanoq iliuusissamik sinerissami aalisartut eqqarsaatigalugit tikkuussisoqaqnginnera pakatsinarpoq, tassami ajornartorsiutit sinerissami aalisartunut ilungersunartorujussuanngortarput, tunitsiviit ulikkaartoorpata imaluunniit annertuumik aalisartunut killilersuippata, tamakkulu kingunerisarpaat aalisarnerup imminut akilersinnaanngitsumik ingerlalersarnera, tamannalu aalisartukkormiunut oqitsuinnaanngitsoq nalunngilarput.

Assersuutigalugu aasaq manna nunaqarfiit aalisarnikkut periarfissaasa pitsaanerpaajunnginnerat Atammimmi aalisartut Qanoruukkut oqariartuutigaat pissutsillu allanngornissaannik kissaateqartarnerat tusaaneqaqngitsoorpoq allilerinissamunngooq akissaqaqnginnamik akissut taanna kisiat akissutigissallugu akikipallaqaaq periarfissaasinnaasunik ujartuisoqarniarli inuussutissarsiorniartummi mattussuinnarsinnaanngilagut.

Assersuutigalugu massakkut umiarsuarmik tunitsivimmik qinnuteqarsimasut avannaani Aappilattumi erinitsallutik inatsisartunut ilaasortanut allagaqarput ajornartorsiummik apuussillutik oqaatigineqarluni qinnuteqaat qangali apuunneqareersimagaluartoq kisiannili tassa massakkumut akineqarsimanngitsoq.

Tunngavilersutaat paasinarluarpoq tassalu ukioq aallartilaaginnartoq tunitsivitsik ulikkaartarmat inuussutissarsiornissaminnut periarfissaarullutik soorunami tamanna ilungersunartoq ataatsimoorullugu aaqqinniartariaqarparput aalisakkammi amigaataanngillat tunitsiviulli killeqarpallaarnera pissutaamat ilungersornerat paasinarpoq aaqqittariaqarlunilu.

Tunitsivittigut periarfissat killeqarput taamaattumik naleqqussartuarnissat piariaqartuannartussaapput makkulu ilagaat umiarsuit tunitsiviit atorluarneqarnissaat, aalisartummi pineqarput taamaattumik aamma taakku tunitsivinni ajornartorsiortarneranni tusaaniarlugit ingerlatsisoqartariaqarpoq imaanngitsoq aalisarnermi siunnersuisoqatigiit kisimik tusaaniarneqassasut.

Aalisarnerup ineriartortinnissaa suli pisariaqaaq aalisariutit nutaanngippallaalerput nutarterisoqassapat aningaasat amerlanerusut nassaarisariaqarput taamaattumik aningaasanik amerlanerusunik pinngortitsinissaq sulissutigisariaqarparput aporfissalersuinerit tunulliullugit ineriartortitsinissarpullu salliullugu.

Naggataatigut sooruna aalisartut tunitsivinnut tunisartagaat aalisakkat tunisassiorfinnut allanut nunatta avataaniittunut naleqqillugit akit appasinnerujuannartut, tamakkulu aaqqinneqassappata

unammillersinnaaneq annertusartariaqarpoq, aammalu aalisartut periarfissallit toqqaannartumik avammut niuersinnaanerat ammaanneqartariaqarpoq, akimmi aalisartunut atuutinneqartut appasippallaarujussuarput allanngortitsiniarta,

Hans Enoksen